

Siunnersuut uunga: Atuagaateqarfiit pillugit Inatsisartut inatsisissaat**Saqqummiussissut**

(Ilinniartitaanermut, Ilageeqarnermut, Kultureqarnermut, Naligiissitaanermullu Naalakkersuisoq)

Siullermeerneqarnera

Naalakkersuisut sinnerlugit Atuagaateqarfiit pillugit Inatsisartut inatsisissaattut siunnersuut matumuuna saqqummiutissavara.

Atuagaateqarfiit ullumikkut qaammarsaasarnerup, ilinniartitsisarnerup kulturimillu ingerlatat siuarsarnissaannik suliaqarput, aammalu paasissutissanik annertusiartuinnartumik pilersitsisoqartuutillugu tusagassiuutillu elektroniskiusut annertunerusumik atorneraluttuinnartillugit kingunerivaa inatsisissatut siunnersuutip saqqummiunneqarnera, taamaammatt atuagaateqarfiit suli innuttaasunut pilerinartumik ullutsinnullu naleqquttunik neqerooruteqarnissaat innuttaasullu akornanni saqqumilaarnissaat pingaartuuvoq.

Ullumikkut ilisimasanik assigiinngitsorpassuarnik pissarsivissaqarmat, atuagaateqarfiit atortunik sunik atugassissasserannut aamma piumasagaaterpassuaqarpoq, assersuutigalugu nipilersuutinik tusagassiiviit elektroniskimillu paasissutissiisarfiit. Tamanna ilaatigut inatsisit atuuttut tunngavigalugit pinngitsoorani tunniussisussaatitaaneq pillugu aalajangersakkat annertusinissaannik annertunerusumik pisariaqartitsisoqalerpoq, taamaalilluni naqitat kisimik pineqaratik aammali elektroniskimik saqqummersitat ilanngunneqassallutik.

Tassunga atatillugu erseqqissarneqassaaq pinngitsoorani tunniussisussaatitaanerup unioqqutinneqarnerani pineqaatissiissutit pillugit inatsit naapertorlugit malittarisassanik pisinnaatitaaffiliisoqarmat, tassunga peqatigitillugu naapertuuttut isigineqarpoq periarfissaliissummik ilanngussisoqassasoq Naalakkersuisut inatsimmi pinngitsoorani tunniussisussaatitaanerup aalajangersakkamik unioqqutitsinerup pineqaatissiissutinik aammalu inatsisit malillugit malittarisassanik atulersinneqarnikunik unioqqutitsinerup tunngavissaliorinnaanerannut.

Aalajangersakkat arlallit ataatsimut isigalugu nutarterneqarnissaasa qulakkeerneqarnissaanik pisariaqartitsisoqartoq tassunga peqatigitillugu paasineqarpoq, soorlu inatsimmi atuuttumi pingaarnertut aqqissuussaanera ingerlatiinnarniarneqarluni. Tamanna isumaqarpoq assersuutigalugu killeqanngitsumik atorniarsinnaatitaanerup akeqanngitsumillu atorsinnaanerup ingerlatiinnarnissaat tunngaviusumik tunngaveqartoq, taamaasilluni isumannaarneqarluni kikkut tamarmik assigiimmik ilisimasanut kulturimullu pigisanut atornissaminnut.

Inatsisissatut siunnersuummi naleqqussarneqarput kommunit ilusai ullumikkut atuuttut, soorlu aamma aalajangersarneqartoq kommunalbestyrelsit pingaarnertut atuagaateqarfimmut sumiiffinni immikkoortortanik pilersitsinissaminnut sunik pingaartitsissanerlutik nalilersussallugu. Aammalu aalajangersarneqarpoq Nunatta Atuagaateqarfianut pisortamut pisinnaasanik piumasqaatinik kommuninilu atuagaateqarfinnut, siunnersuullu Groenlandicami katersanut tunngatillugu erseqqissaassuteqarpoq, taassuma iluani innuttaasut katersukkanik ilisimatuussutsikkullu atuagaateqarfimmut takunnissinnaanissaat qulakkeerneqarmat.

Naggasiutigalugu oqaatigineqassaaq aalajangersakkami atuagaateqarfimmiittutisiat pillugit nassuiaat tamatigoornerulermat siunissamilu atorneqarsinnaanerulerluni, kikkut atuagaateqarfimmiittutisianik pisinnaatitaanersut tamakkiisumik allaaserineqarmat kikkullu pineqarnersut assersuusiorneqarlutik. Peqatigitillugu atuagaateqarfimmiittutisiat pillugit malittarisassiorsinnaanermik pisinnaatitsineq erseqqissarneqarpoq, tassunga ilanngullugu inuit pineqartut killilerneqarnerat aammalu taakkununga atuagaateqarfimmiittutisiat agguarneqartarnerat.

Erseqqissaassutigineqassaaq Atuagaateqarfimmiittuteqarnermut akissarsiassat pillugit Namminersornerullutik Oqartussat nalunaarutaat nr. 15, 5. oktober 1999-imeersoq, landstingip peqqussutaanut attuuttumut tunngaveqarluni inatsit atuutilernikoq, inatsisissatut siunnersuut akuersissutigineqarpat iluarsaanneqarnissaa pilersaarutaammat.

Taamatut oqaaseqarlunga siunnersuut Inatsisartunut oqaluuserisassanngortippara.